

陝西 省

續修醴泉縣志稿

中國方志叢書・華北地方・第三一四號

據

張道芷等修曹驥觀等纂
民國二十四年鉛印本

影印

陝西 省

續修醴泉縣志稿
(一)

成文出版社有限公司印行

續修醴泉縣志稿

王謙柄題



月	乙
印	求
	八

續修醴泉縣志稿序

縣之有志與國之有史同其所載人文之盛衰風俗之醇澆政治之良窳雖時移世易考古者瀏覽前塵而某賢某否某得某失實足以資借鏡動觀感寓勸懲焉斯固裨益世道人心之一大關鍵也醴邑爲關輔屏藩襲古今遺蹟舉凡風土山川官師人物其所以光昭志乘丕著風徽者何可殫述舊志自前清乾隆時編纂後中間失修歷一百五十餘年其間時勢之變遷政局之改革社會之進化雖朝野名宿不無節錄紀實之作但搜採無主不免終歸散佚使再舍此不圖不獨前事渺茫如鳳毛麟角之難尋恐即近數十年中所能知者亦更如蒼狗白雲無

從方物矣又豈可須臾緩耶前任胡公銘荃見及於斯因聘績學紳耆分擔纂訪計日計款期於成書半載草創粗具規模未竟厥功解組以去道芷曩歲問政武功拜讀康志不禁心折即擬禮聘通材碩學勉步後塵未果行而去任去冬承乏醴泉欣悉續修邑乘實獲我心遂毅然蕭規曹隨會同邑紳黽勉從事旁徵博採務求詳盡斟酌損益力屏虛浮又四閱月而始蒧事如地理人文名勝古蹟物產貨殖等等踵事依例蒐討備載然不敢謂遽臻完善也蓋歷代相因郡邑有志雖非國史可備方聞上之體國經野可探利病之源次之考獻徵文兼備參稽之用且當此風俗日偷道德墮落之際倘能家置一編父詔其子

兄勉其弟則先民之桀黷不遠將見民風不變反樸還醇觀感
所資頑廉懦立是挽回人心世道者不必待齊之以政刑也道
芷得與參加樂觀厥成曷勝快愉更不敢掠人之美以爲己功
謹畧述其顛末如此至補其所未備爲蔚然之大觀仍望將來
賢達有以宏我漢京現將付梓聊具弁言以應同人之請是爲
序

民國二十四年四月夷門張道芷序於醴泉縣政府

序

歲壬戌余奉命視事醴泉甫捧檄即有邑耆老數人進言曰醴
最爾小邑也屢經殘破彫敝甚矣幸神君蒞止將慶更生敢以
地方之疾困暨體民之殷殷期望者告詢其所以則曰土匪擾
民糧差病民暨縣志之未修也迨下車延見地方諸紳董詢以
爲治之所急則所述與各耆老同余維土匪糧差雖現時爲害
甚烈苟防制得宜清釐有法其效不難期月覩惟查邑志修於
清乾隆四十八年迄今更歷一百五十餘年之久中又變經滄
桑故家遺俗多就泯滅今欲於代遠年湮兵火流亡之後撫拾
廢墜以期文獻之有徵誠非易事然今茲不爲後將更難忝任

地方責又誰諉爰即商同各紳先成立醴泉文獻委員會同時依法選舉邑紳曹驥觀爲委員長邑紳王夢篆副之餘委員均以次選定呈請省政府立案修志事即責成該會該會公推曹委員長爲總纂編輯等事王副委員等分任之即日開始先從事著手採訪均能以服務桑梓努力進行計爲時僅兩月餘採訪已具有大端復經王副委員長夢篆暨委員王建極等分門編纂尤獲於最短期間裒然成帙熱心毅力誠堪驚佩現已將全稿送曹委員長核閱俾其再加考訂詳爲點竄以期事實無訛後可傳信行將付印矣而余適奉命調省自維一年以來於地方諸事百無成就獨現時土匪潛蹤徵糧改善邑乘又不日

告成於醴民所疾苦並殷殷期望者得以差告無罪竊用自幸
諸紳以邑志之成歸功於余屬爲弁言余自愧攘人之善且不
文深拒弗獲謹歷次此事所經之程序暨諸委員任事之勤勞
敬告後來焉是爲序

民國二十三年醴泉縣縣長河南舞陽胡銘荃

序

余束髮受書即耳熟修志之議其時令吾醴者爲湖北松滋熊公始延先姑丈王雲幕先生先同州公諸人爲採訪每聞私議文獻閱百年散佚實多懼弗勝旋熊他調事仍寢閱十餘年江蘇通州顧姓谷先師任縣事欲成其事而經費困之姓谷師專精史漢文名震關輔弗竟其志邑乘之不幸也迨民國初年先同州公予告歸恆提議及之而值地方多事應者寥寥後庚申陝西續修通志開局延先芝田師長其事邑人士請兼綜其成已開局採訪歷有月日又以匪亂中輟然歲月不居距熊令醴時又駸駸將五十年矣滄桑陵谷俗風移易老成之彫零舊典

之廢墜試與言咸同間事已多瞠目不解者況上溯嘉道耶聞之章氏實齋云志爲史所取材紀事而已非尙文詞文詞如康志武功韓志朝邑猶多可議其下更何論焉醴舊有苟志裘志宮志今皆弗傳所見者僅蔣志成於孫陽湖先生考據精詳堪以傳久但詳昭陵而畧地方宜後人有昭陵志之議而以漢儒鄭樸並周天后時酷吏侯思止同列聞人合兵事祥異風俗仙釋流寓昭建陵瑣記悉以舊聞核之尤覺其輕重失倫括舉未協也今本章氏之言存其所長而補其所短故不敢爲重修而僅出於序雖改分十門仍從蔣志如沿革道里山川陵墓金石之類從者猶多其現時訪得並舊制之變更者則謹附於後仍

恐遺漏不免體例未諸名之爲續修醴泉縣志稿留待後賢之增刪焉續貂之譏或可免夫余因之有感矣邑志之修非無其時非無其人而熊公始之先歿谷師繼之先同州公先芝田師又繼之皆不克有成蓋若是之難也此次河南舞陽胡君來吾醴納衆議決計續修王丹華王太初諸君復能果力精心尅期蒞事胡君他調繼任河南夷門張君尤能竭力贊助以底於成又何若是之易也豈眞所謂事皆前定非至其時人固無如之何耶獨惜先正云亡父師繼喪余小子以不學之躬敢起而秉筆焉則仍醴志之不幸也夫民國二十四年乙亥春三月邑人曹驥觀序於西安省寓之四硯齋

凡例

一醴泉縣志之修始於明季蔣志藝文所載縣志序文則有
苟裘宮等惜其書皆早散佚微特見者鮮即知者亦鮮現
傳者則知縣蔣騏昌並孫陽湖先生修於清乾隆四十八
年者也陽湖碩學通儒後生小子曷敢妄議故此次雖云
續修謹於門類稍有變更序述仍多從前志又恐遺漏不
免欲俟後來博雅君子裁成另訂故名之爲續修醴泉縣
志稿

一蔣志以兵事祥異荒政古蹟等悉括之以舊聞分縣爲縣
屬鄉爲鄉屬以至陵墓廟官等皆以屬分之今變更其例

統全書分爲十志一地理二建置三賦稅四官師五人物
六選舉七兵事八風俗九藝文十雜記各從其類分別子
目包括蔣志之所有增列其所無續修職責祇在於是
一現時修志者多於所分門類別列小序隱括其中大意暨
序次聯串之法茲旣爲續修志稿雖分別各門序述仍多
存其舊若亦故爲效顰是不啻以羹藜飯糗之夫強論太
牢滋味其不至貽譏著糞佛頭者亦僅矣又聞之方志爲
國史要刪辭達而已素蒙執筆幸可藏拙然苟爲鄙見所
能及亦按語於後仍復委曲詳盡期於條達若譏辭費其
何敢辭

一邑城自漢唐宋以迄明代屢易其地今所知者祇谷口故址暨舊縣村今縣治三處餘多無考蔣志於縣境道里之相距援引諸書非不詳贍但仍有不可解者則以治城時有遷移諸書因時代先後間有疏畧試畧舉之如谷口故城在今縣治東北七十里通典謂在今縣北後漢書注寰宇記謂在縣東北四十里又寰宇記醴泉縣京兆府西北一百二十里其城即古仲橋城胡三省又謂鄭國渠經仲山渠有橋謂之仲橋在九嵕山東蔣志又謂唐故城即仲橋在今縣東北十里宋初同今縣治北門外有橋名仲橋命名之義亦不可考文獻失傳僅恃採輯以爲補綴何去

何從安得起古人而一一就正哉

一 此次採訪編輯時日過迫而距蔣君修志以至今日歷年又甚久文獻淪亡老成彫謝各門之缺失尤以官師選舉人物列女爲更甚切望後起賢達隨時留心分類採輯彌補其缺焉

一 蔣志於官屬其賢者尙有論列不肖者但書其名雖意存忠厚似不足以示勸懲而戒後來今既改官屬爲官師志則各就其平日優劣直書不隱以彰直道

一 蔣志成於科舉盛行時代故於甲科舉貢分別列表記之特詳而於學校則畧今科舉既停取士以學校爲憑則今